

1 TESALONAIKA

Pepa Paulo iŋgere muŋga panzi kalo-tawana tamâta simo Tesalonaika lawea

Tesalonaika nde lawea ŋalae tonje ikeno Masedonia tâno. Paulo muŋga imo ŋinde itula pâri ara panzi, kala tamâta pinde kalonzi tawana Yesu. Andeta kinzi Juda tamâta sikai kazâŋa pa Paulo, kala ipilenzi ilâ (Pâri Tamâta 17:1-10). Ilâ ipâŋga Korin lawea lâ, aku muli ŋga Timoti imâ itapâri papa ŋana Tesalonaika ŋgu nenzi kalo-tawana, kala Paulo iŋgere ŋgua ŋine ilâ panzi. Paulo ilo ndo keno panzi, aku lâ pepa ŋine tini itu ipu tini kaika pa ilonzi kalonzi. Itula vetâŋa arara pinde ŋana ma sipaveta kuku, ŋineŋga itula ŋgua panzi ŋana nenda mandiŋa lâ materja nianzi wa Yesu ne zo ŋana itaulo imâ kilo (4:13-18).

1 ¹Maka ŋato, Sailas ŋga Timoti ŋga naŋa Paulo warakâŋgu, maka kamo taitu, kala naŋa aŋgere ŋgua ŋine imâ pa miki kalo-tawana tamâta kamo Tesalonaika lawea, miki ŋinde uru kalomi tawana Tamânda Maro Kindeni ŋga Maro Yesu Kirisi. Maro Kindeni ne wisi-wisi wa wisi-pisi wa imâ pami.

Paulo ilo ara ŋana Tesalonaika tamâta nenzi kalo-tawana

²Ikura zo rârâni maka uru kaloma ŋgere ŋanami, aku maka kaporo ndaŋge ilâ pa Maro Kindeni. Maka uru kano pa i ŋana miki kâ ikura lâ nema noŋa rârâni. ³Maka kawama ndaŋge pa Tamânda Maro Kindeni, ŋana tu nemi kalo-tawana uru ipaŋo ilomi kalomi ŋana kaveta vetâŋa ara kâ. Aku miki tinimi mwasa panzi tinimi pinde, kala uru kaveta wurâta ara nâ. Aku miki kao tinimi ŋana Maro Yesu Kirisi kâ, kala uru kamandi kaika ku kamo nâ.

⁴Nima-nambwe wukale, maka kasama tu Maro Kindeni ilo ndo keno pami, aku ipateami tu ma kapâŋga i ne ŋgu sondo. ⁵Maka kasama ŋine ŋana tu muŋga, lâ zo ŋinde maka kakai pâri ara kamâ pami, ande pâri

ara ŋinde ŋandai ipâŋga pami itogo tapâriŋa kaa nâ ŋga. Ŋinde ipâŋga tava Koroani Sapâŋa ne walo wa ne mâsi kaika wa, aku miki kamora nema kalo-tawana kaika ŋinde pwataki lâ. Miki warakami nde kasama ŋana maka nema pavilâŋa lâ zo ŋinde maka kamo ŋginimi. ⁶Miki kalonjo Maro Kindeni ne ŋgua lâ, kala miki kapaveta kuku maka nema vetâŋa tava Maro Ŋalae ne vetâŋa. Ŋinenŋa malia ŋalae tina ipâŋga pami lâ, andeta Koroani Sapâŋa iveta ilomi ara kala miki kandeka ku kamo kapaipa kuku pâri ara ŋinde. ⁷Aku nemi vetâŋa ŋinde itula nzâla arando panzi kalo-tawana tamâta rârâni simo Masedonia tâno wa Akaia tâno wa. ⁸Miki katula mâsi ara ŋana koka Maro Ŋalae ne ŋgua muli, aku ŋinde ilâ itogo wâŋgu ne nduŋeŋa mwasina. Andeta nduŋeŋa ŋinde ilâ ipâŋga lâ Masedonia tâno wa Akaia tâno simbonzi nâ, ande tia. Ikura lawea rârâni, ande tamâta silonjo parinami tu miki kalomi tawana Maro Kindeni. Mine kala maka nema wurâta ŋana katula parinami panzi kâ keno, nde tia. ⁹Aku kinzi warakanzi kala uru situla ŋgua ŋana vetâŋa arara ŋinde miki muŋga kaveta, lâ zo ŋinde maka kamo kumi. Kinzi situ parinami tu miki kapu mulimi panzi maro laŋeŋa lâ, aku kapalele ilomi kalomi ilâ pa Maro Kindeni Via Tamwata, ina Maro Mao Kanaŋo, aku kapono muli pa i simbo nâ. ¹⁰Aku situ parinami tu miki uru kao tinimi ŋana zo ŋinde Maro Kindeni Natu ma ipile samba lawea ku itaulo imâ kilo. Inani kala Yesu, muŋga imâte lâ, andeta Maro Kindeni ipaŋo i imo via kilo. Aku i ma ikeka ŋana kinda kâ, kala ma tamo ara lâ zo muli ŋinde Maro Kindeni ne wisi-nâna ŋana tamâta nenzi kiesaka kâ ma ipâŋga nia yo.

Paulo itula ŋgua pwataki ŋana wurâta muŋga iveta lâ Tesalonaika

2 ¹Nima-nambwe wukale, miki warakami kasama tu maka muŋga kaveta wurâta kaa nâ lâ zo ŋinde kamo kumi, ande tia. ²Miki kasama tu maka muŋga kamo Pilipai lawea, aku lâ lawea ŋinde maka kakai nâna ŋalae. Kinzi siyaula karaema wa siporo ŋgua pavaligiŋa pama wa. Andeta lâ zo ŋana maka kamâ pami, nenda Maro Ŋalae Kindeni ipu tini kaika pa iloma kaloma, kala maka kamege ŋana kazâŋa ŋinde kâ, ande tia ndo. Maka kakisi kaika nâ, aku katula Maro Kindeni ne pâri ara pami. ³Aku lâ zo ŋana maka kanomi tu kapalele ilomi kalomi ilâ pa Yesu, ande maka kaporo ŋgua soki ku kaveta vetâŋa potomule wa laŋeŋa wa, ande tia. ⁴Maro Kindeni isama maka kilalama lâ, aku i tamwata ipatea wurâta pama tu ma katula i ne pâri ara. Mine kala maka ŋandai iloma tu tamâta ma sisuka maka ŋama kâki ŋga. Maro Kindeni simbo nâ imora iloma kaloma pwataki lâ, aku maka iloma tu i nâ ma ilo ara pama ŋana nema wurâta kâ. ⁵Miki kasama lâ, aku Maro Kindeni kala isama mine nâ tu maka muŋga kaporo ŋgua mâru-mâru pami, ande tia ndo. Aku maka ŋandai iloma yosi ŋana nemi kekekele kala kaporo ŋgua ara pami. ⁶Lâ zo

ņinde, maka ņandai iloma tu miki ma kandekanama ņga. Aku mine nâ, maka ņandai iloma tu tamâta pinde ma sindekanama ņga.

⁷Mao nâ, maka kamo Yesu Kirisî ne pâri-tamâta. Mine kala kaloņo ņga; ambo maka iloma tu miki ma kasukama ņana kelekele pinde kâ, ande maka kakura ņana kaporo kaika pami tu kaveta mine. Andeta zo ņinde maka kamo kumi, ande maka kamo mwasa nâ, itogo taine uru imagegea natu puro-puro mine. ⁸Maka iloma ndo keno pami; mine kala maka kandeka nâ ņana kaporo katula Maro Kindeni ne pâri ara pami. Aku maka kala kapaveta sondo ņana kapayaula nema via ņana kavila miki kâ, ņana tu maka iloma ndo ikeno pami. ⁹Nima-nambwe wukale, miki kasama lâ ņana wurâta ņalae maka muņga kaveta, lâ zo ņinde kamo kumi. Maka kamâ ņana katula Maro Kindeni ne pâri ara pami, aku maka tinima pwâka tu miki ma kaveta wurâta ņalae ņana kakatona maka ņana kâņa-nuņa kâ. Mine kala maka kaveta wurâta kaika lâ kari wa mbo wa, ņana kakai mbumbu tu kapako kapwama.

¹⁰Miki kasama lâ, aku Maro Kindeni kala isama mine nâ ņana vetâņa rârâni maka kaveta lâ miki kalo-tawana tamâta ņginimi. Maka nema vetâņa ņinde nde ara ndo lâ Maro Kindeni nao; maka kaveta vetâņa soki toņge tia. ¹¹Miki kasama tu maka muņga kaveta kema ara nâ pa miki taitu-taitu, itogo tamâta uru iveta kie ara panzi natu mine. ¹²Mao nâ, maka kaporo ņgua ņana igagati ilomi kalomi ku ipu tini kaika pami. Aku maka kanomi tu ma kamo sondo, ikura Maro Kindeni tamwata ipatea pami mine. Maro Kindeni ina isarawami tu ma kasama i ne walo ņalae, aku isarawami tu ma kamo kunzi ņgu ņine i uru ikai maro panzi.

Kinzi kalo-tawana tamâta lâ Tesalonaika lawea simandi kaika ņana sikale malia kâ

¹³Lâ zo ņana miki kaloņo Maro Kindeni kawa ņgua maka katula pami ņinde, ande miki kakai ņgua ņinde itogo tamâta nâ nenzi ņgua, ande tia. Miki kaloņo ku kakai ņgua ņinde itogo Maro Kindeni kawa ņgua mao. Aku mao nâ, ņgua maka katula pami ņinde nde Maro Kindeni kawa ņgua. Aku i tamwata uru ikai wurâta kaika lâ miki kalo-tawana tamâta ilomi kalomi. Ikura zo zo maka kawama ndaņge ilâ pa Maro Kindeni ņana ņine kâ. ¹⁴Nima-nambwe wukale, miki kapâņaga katogonzi Maro Kindeni ne kalo-tawana tamâta simo Judia tâno, kinzi ņinde sipaipa kuku Yesu Kirisî lâ. Miki kakai malia lâ warakami nemi ņgu mbaunzi, itogo kalo-tawana tamâta simo Judia tâno muņga sikai malia lâ Juda ņgu mbaunzi mine. ¹⁵Muņga kinzi Juda ņgu sipu Maro Yesu tavanzi kinzi ņgua-tulâņa tamâta pâta simâte, aku siņara maka tona. Kinzi taņanzi kaika ku sikai kazâņa pa vetâņa ara rârâni Maro Kindeni ilo papa ņinde. Aku kinzi simo sitogo tamâta rârâni nenzi nânâo mwasina. ¹⁶Kinzi sitogo tu sipono nzalama, ņana maka ma kakura tu katula pâri ara

panzi tamâta lâ tinikoa ŋgu tia. Kinzi tininzi pwâka tu Maro Kindeni ma ivilanzi ŋgu ŋinde tu simo vianzi ku simo nâ. Mine kala ikura zo zo kinzi siveta kiesaka, kala kiesaka ŋinde ipâŋga ŋalae tina. Aku ŋana ŋine kâ Maro Kindeni ne wisi-nâna nde imâ panzi lâ.

**Paulo ilo ndo tu imoranzi kalo-tawana
tamâta lâ Tesalonaika lawea kilo**

¹⁷Nima-nambwe wukale, kinzi Juda tamâta siŋara maka lâ, kala kapilemi ikura zo pinde. Maka kamora naomi tia, andeta iloma nde keno pami yo. Maka iloma ŋalae tina tu kamorami kilo. Mine kala maka kaveta wurâta kaika karoto nzâla ŋana kataulo kamâ pami. ¹⁸Maka iloma tu kamâ pami, aku naŋa Paulo warakâŋgu apatogo tu ataulo amo kumi mbwaningū pinde. Andeta Sadana isae nzâla ŋanama. ¹⁹Maka iloma tu kamo kumi, ŋana tu lâ zo ŋana nenda Maro Yesu ma itaulo imâ kilo, ande kelekele ndia ma isuka maka tu kamandi kaika ku kandeka lâ i nao, a? Aŋga kelekele ndia ma itula pwataki tu maka kaveta nema wurâta ara lâ, a? Maka ma kandeka ŋana miki ni. Tamâta tonje ipole miki ŋana iveta ndekâŋa ipipi lâ iloma kaloma, ande tia. ²⁰Mao nâ, maka ma kandeka ŋana miki kâ, aku miki warakami ma kaveta iloma kaloma ikeno ara ndo.

**Paulo isupwa Timoti ilâ pa Tesalonaika lawea
ŋana isukanzi kalo-tawana tamâta**

3 ¹Maka kamo tava iloma malia mine lee, ŋineŋga iloma patea tu zo ŋga ipâŋga lâ. Mine kala maka kapa ŋgua tu maka rua ma kamo Atens lawea, ²aŋga Timoti nde ma kao imâ pami. Ninda-nambwe Timoti nde Maro Kindeni ne kuleŋa tamâta ŋana itula pâri ara ŋana Yesu Kirisi kâ. Maka rua kao i imâ ŋana isukami ku ivilami, ŋana nemi kalo-tawana ma ikeno kaika nâ. ³Ambo Timoti ma imâ pami tia, ande nâna wa malia nemi ŋgu siveta pami ŋinde ma iveta miki pinde ilomi kalomi râra. Miki warakami nde kasama tu Maro Kindeni muŋgani ipatea kindu tu ma takale malia mine nâ ŋana nenda kalo-tawana kâ. ⁴Muŋga maka kamo kumi, aku lâ zo ŋinde maka kapaimi tu malia kie-kie ma ipâŋga pa kindu. Aku miki kasama tu zo sakamao mine nde imâ ipâŋga lâ. ⁵Mine kala naŋa amo nâ, ande tia. Naŋa atu asama ŋana miki nemi kalo-tawana tu ikeno mana, ande kala ao Timoti imâ pami lâ. Naŋa kalongu loko tu koroani saka nenzi koipu ŋalae nde iveta samâŋa pami tâ ku isowe ilomi kalomi, kala maka nema wurâta ilâ kaa nâ. Andeta tia.

Paulo indeka nâ, ŋana tu Timoti ikai ŋgua ara itaulo imâ

⁶Ayo, Timoti imâ imo kumi lee, ŋineŋga ipilemi ku ilâ. Kala muŋga nâ imâ ipâŋga pa maka lâ, aku itapâri ŋgua ara ndo pama. Itula ŋgua

tu miki nemi kalo-tawana ikeno kaika ndo, aku miki uru tinimi mwasa nâ panzi tinimi pinde. Aku itapâri tu ikura zo rârâni miki kalomi ngere ɲana maka kâ, aku wisimi ara pama tona. Aku miki kala ilomi ɲalae tu kamâ kamora maka, itogo maka iloma ɲalae tu kamâ kamora miki mine nâ. ⁷Nima-nambwe wukale, maka kaloŋo parinami tu nemi kalo-tawana ikeno kaika ndo, aku ɲinde ipu tini kaika pama lâ zo ɲinde malia wa nâna rârâni ipânga pama lâ. ⁸Maka kasama tu miki kapaipa ndo kuku Maro ɲalae, kala ɲine maka iloma ara ku wisima puu ndue lâ. ⁹Maka kaloma ngere ɲanami ku kandeka pâta lâ nenda Maro Kindeni nao. Maka kawama ndaŋge ilâ ɲalae pa Maro Kindeni, andeta nema ndekâŋa nde ɲalae ndo, ipole nema ɲgua ɲinde. ¹⁰Maka uru kano kaika pa Maro Kindeni ikura kari wa mbo wa. Maka kano tu i ma iveta nzâla pama ɲana kamâ kamorami kilo. ɲineŋga maka ma kakura tu kasukami, aku nemi kalo-tawana ma ipânga ɲalae.

Paulo ino pa Maro Kindeni tu ma io i ilâ panzi

¹¹Maka iloma tu Tamânda Maro Kindeni tamwata kuku nenda Maro ɲalae Yesu rua ma sikai nzâla piti, ɲana maka ma kamo kumi. ¹²Aku maka iloma tu Maro ɲalae ma isuka miki, ɲana nemi tini-mwasa panzi kalo-tawana tamâta sitavanzi tamâta rârâni ma ipânga ɲalae, itogo maka nema tini-mwasa ikeno pa miki mine nâ. ¹³Maka iloma tu Maro Kindeni ma isuka nemi kalo-tawana. Mine kala lâ zo ɲana nenda Maro ɲalae Yesu tavanzi ne tamâta rârâni ma sitaulo simâ kilo, ande Tamânda Maro Kindeni ma imora miki tu kamo mbâra-mbâra ndo, nemi kiesaka toŋge tia.

Kinda ma taveta vetâŋa potomule ndimo

4 ¹Nima-nambwe wukale, maka muŋga kapananami ɲana vetâŋa arara ɲana miki ma kapaveta kuku. Ambo miki ma kapaveta kuku vetâŋa arara ɲine, ande Maro Kindeni ma ilo ara. Aku maka kasama tu nemi vetâŋa ikeno mine nâ. Kala ɲine maka kakai Maro ɲalae Yesu ndamwa ku kaporo kapu tini kaika pami tu miki ma kaveta vetâŋa arara mine ipânga ɲalae. ²Maka muŋga kakai Maro ɲalae Yesu ndamwa ku katula ɲgua tukuŋa rârâni yâti, aku miki kaloŋo lâ.

³Maro Kindeni ilo tu miki ma kamo ilomi mbâra-mbâra, aku i ilo tu miki ma kaŋgeŋge ɲana vetâŋa sakamao ɲana kapalulua tinimi potomule kâ. ⁴I ilo tu miki ma kapakatona sondo ɲana vetâŋa sakamao tava ilo-kalo sakamao uru ipânga nâ lâ ilomi. I ilo tu miki ma kamo sondo, aku ma kapaveta kuku vetâŋa ara rârâni i tamwata ipatea pami ɲinde. ⁵Tia ma miki kambe ɲana ilo-kalo wa vetâŋa sakamao ɲinde, aku miki warakami ma kaveta vetâŋa sakamao ɲana kapalulua tinimi potomule kâ, itogo kinzi tinikoa uru siveta mine. Kinzi ɲinde sizizâla ɲana Maro

Kindeni ne pateâŋa, kala siveta mine. ⁶Miki ma kaveta soki tonje mine panzi kalo-tawana tamâta ndimo. Maka muŋga katula ŋgua pwataki pami tu muli ŋga Maro Ŋjalae ma ipare nia panzi tamâta ea siveta vetâŋa sakamao kie mine râŋâni. ⁷Maro Kindeni ipatea kinda ŋana tapaveta kuku vetâŋa potomule mine, ande tia ndo. Ipatea kinda ŋana tamo sondo lâ i nao. ⁸Mine kala tamâta ea ipu muli pa ŋgua tukuŋa ŋine, ande i ipu muli panzi tamâta tia; ipu muli pa Maro Kindeni, ina kala uru io ne Koroani Sapâŋa imâ pami.

Kinda ma tapakatona sondo ŋana nenda vetâŋa kê

⁹Muŋga Maro Kindeni ipanana miki warakami ŋana vetâŋa ŋana tinimi mwasa panzi kalo-tawana tamâta kê. Mine kala naŋa ma aŋgere ŋgua pinde imâ pami ŋana vetâŋa ŋinde kê, ande tia. ¹⁰Aku mao nâ, miki uru tinimi mwasa nâ panzi kalo-tawana tamâta simo lawea ndoni lâ Masedonia tâno. Ambo taitu nima-nambwe wukale, maka iloma tu kapu tini kaika pami ŋana miki ma kaveta vetâŋa ara mine ipâŋga ŋalae ndo.

¹¹Miki ma kapakatona sondo ŋana kamo mwasa nâ, aku kaveta warakami nâ nemi kelekele. Kapakatona warakami, aku kaveta wurâta tava warakami nâ mbaumi, ikura maka muŋga kapananami mine. ¹²Ambo miki ma kaveta mine, ande wurâta ma ikeno panzi tinimi pinde ŋana sisukami ŋana kelekele kê, ande tia. Aku tamâta simo niaka ŋana pâri ara kê ŋinde ma sindeka nâ ŋana nemi vetâŋa kê.

Maro Ŋjalae ma itaulo imâ kilo ŋana igona kinda kê

¹³Nima-nambwe wukale, maka iloma tu miki ma kasama ŋgua mao ŋana vetâŋa ndia ma ipâŋga panzi mateŋa tamâta. Tia ma kalo-sukâŋa ŋalae ipâŋga pami, itogo uru ipâŋga panzi tamâta ŋinde kalonzi tawana Maro Kindeni tia. Kinzi ŋinde uru sio tininzi ŋana nenzi mandîŋa lâ kuru nia, ande tia. ¹⁴Aŋga kinda nde kalonda tawana tu Yesu imâte lâ, ŋineŋga imandi imo via kilo. Mine kala kinda tasama tu Maro Kindeni ma ipaŋonzi kalo-tawana tamâta ŋinde muŋga simâte, aku ma ionzi simo kuku Yesu. ¹⁵Maka katula Maro Ŋjalae kawa ŋgua pwataki pami mine; lâ zo ŋana Maro Ŋjalae ma itaulo imâ kilo kê, ande kinda tamâta kala tamo viânda lâ tâno kulu ŋine ma tamuŋga panzi tamâta ŋinde muŋga simâte, ande ma tia. ¹⁶Ŋana tu Maro Kindeni ma isuŋa kawa, aku aŋelo nenzi koipu ŋalae ma isarâwa, aku Maro Kindeni ne tando ma ita. Aku Maro Ŋjalae tamwata ma ipile samba ku indue imâ. Aku tamâta ŋinde muŋga simâte tava nenzi kalo-tawana, kinzi ŋinde ma simandi muŋga, aku ma simo vianzi kilo. ¹⁷Ŋinde ma ilâ lâ, ŋineŋga Maro Kindeni ma igona kinda tamâta kala tamo viânda lâ tâno kulu ŋine, aku ma takâki talâ kunzi pa nia maa ŋinde ikeno âta. Aku kinda râŋâni ma tamo taitu kuku Maro Ŋjalae, ma tamo mine ku tamo nâ. ¹⁸Mine nde ara ŋana miki kalo-tawana

tamâta rârâni ma katula ŋgua ŋine pwataki, aku kapaturu warakami ilomi kalomi tu ma ipu tini kaika pami wa iveta wisimi puu ndue wa.

**Kinda tamo tao tininda nâ ŋana Maro Ŋalae
ne zo ŋana ma itaulo imâ kilo**

5 ¹Nima-nambwe wukale, maka nema wurâta ikeno ŋana kaŋgere ŋgua ŋana zo ndia wa kari tai ŋapia vetâŋa rârâni ŋinde ma ipâŋga kâ, ande tia. ²Miki warakami kasama tu Maro Ŋalae ne zo ŋana itaulo imâ kilo kâ nde ma ipâŋga nâ, itogo panawe tamwata imâ ŋana ne panaweŋa lâ mbo ŋgini-ŋgini, aku kinda tazizâla ŋana. ³Kinzi tamâta ma siporo mine, “Zo ŋine nde ara pâta, kala tamo ara nâ”. Andeta lâ zoni ndaina, ande vetâŋa ŋana izavarunzi kâ ma nao panzi imâ walele nâ, itogo nâna uru ikainzi taine sipaguguanzi natunzi mine. Aku kinzi tamâta ma sikura tu siŋgeŋge ŋana nâna ŋinde kâ, ande tia.

⁴Aŋga nima-nambwe wukale, miki ŋandai kamo kondoma ilo ŋga. Mine kala lâ zo ŋana miki kamora mâsi ŋinde imâ ipâŋga, ande miki ma wisimi motu itogo tamâta wisi motu ŋana panawe tamwata imâ ŋana ipanâwe kâ, mine ndimo. ⁵Miki kalo-tawana tamâta rârâni nde ŋana kamo kari wa sinâla nâ ilo. Kinda ŋandai tamo mbo tava kondoma nenzi tamâta ŋga. ⁶Kinzi tamâta simo niaka ŋana pâri ara kâ ŋinde uru sikeno nâ, andeta kinda ma taveta mine ndimo. Ara ŋana kinda ma tao tininda nâ, aku tapakatona ilonda kalonda sondo ndo. ⁷Kinda tasama tu tamâta uru sikeno lâ mbo nâ, aku uru sinu lââ kaika ku sidauda lâ mbo nâ. ⁸Aŋga kinda nde tamâta ŋana tamo sinâla nâ ilo. Mine kala ara ŋana kinda ma kalonda ŋgere sondo. Vetâŋa ŋana kalonda tawana Maro Kindeni kâ, aŋga vetâŋa ŋana tininda mwasa panzi tininda pinde, vetâŋa rua ŋinde nde itogo nenda pasawaŋa ŋana tiŋgi-tiŋgi kâ. Aku vetâŋa ŋana tao tininda pa Maro Kindeni tu ma via mao ilua kinda lâ samba lawea, ande vetâŋa ŋinde itogo nenda siŋgâra kaika ŋana tasawa lâ kulunda mine. Aku kinda tamandi kaika lâ ŋinde tini. ⁹Maro Kindeni ŋandai ipatea tu i ma nâna ilua kinda ŋana nenda kiesaka kâ. Ipatea tu nenda Maro Ŋalae Yesu Kirisi ma ikai kinda piti lâ kondoma ilo ku via mao ilua kinda. ¹⁰Yesu imâte ŋana ikai nzâla piti pa kinda tu ma tamo ara kuku i, aku lâ zo ŋana i ma itaulo imâ kilo, ambo kinda tamo viânda tâku tamâte tâku, ande ma tamo viânda kuku i. ¹¹Mine kala ara ŋana miki taitu-taitu ma kapu tini kaika panzi kalo-tawana tamâta, aku kavilanzi ŋana simandi kaika tona, itogo miki uru kaveta mine.

**Maro Kindeni uru ivilanzi kalo-tawana
tamâta ŋana nenzi vetâŋa ara kâ**

¹²Nima-nambwe wukale, Maro Ŋalae ipateanzi tamâta pinde tu siveta wurâta ŋalae lâ miki ŋginimi. Ipateanzi ŋana sikai poe pami ku siveta

nemi ilo-kalo sondo. Maka kanomi tu miki ma kamege ŋananzi tamâta ŋinde. ¹³Miki ma kamege ndo ŋananzi ku kao ilomi ndo ilâ panzi, ŋana tu nenzi wurâta ŋinde nde ara ndo. Aku miki rârâni ma kamo ilomi kalomi taitu nâ. ¹⁴Nima-nambwe wukale, maka kanomi tu miki ma kaporo ŋgua kaika panzi kalo-tawana tamâta ŋinde simo itogo wulitia tamwatanzi, ŋana kapaŋo ilonzi kâ; aku kapu tini kaika panzi tamâta ŋinde uru simo kalonzi loko nâ; aku kavilanzi tamâta ŋinde nenzi walo keno tia. Aku miki rârâni ma kamo mwasa nâ kunzi tamâta rârâni. ¹⁵Ambo tamâta tonje iveta kie sakamao pami, ande miki ma kakatu mbuku kilo papa i ndimo. Ikura zo rârâni, ara ŋana miki ma kamandi kaika ŋana kaveta vetâŋa ara nâ panzi kalo-tawana tamâta sitavanzi tamâta rârâni.

¹⁶Ikura zo rârâni, ande ara ŋana miki ma kandeka ku kamo nâ. ¹⁷Aku ara ŋana miki ma kakai noŋa pa Maro Kindeni ikura zo zo. ¹⁸Ambo vetâŋa tonje ma ipâŋga pami ku iveta ilomi malia, ande ara ŋana miki ma kawami ndaŋge pa Maro Kindeni. I ilo tu miki tamâta kala kapaipa kuku Yesu Kirisi ŋinde ma kaveta mine.

¹⁹Lâ zo ŋana Koroani Sapâŋa itu iveta wurâta tonje lâ miki ilomi, ande miki ma kapono nzâla ŋana wurâta ŋinde kâ ndimo. ²⁰Ambo tamâta pinde ma situla Maro Kindeni kawa ŋgua pwataki pami, ande miki ma tinimi pwâka ŋana ŋgua ŋinde ndimo. ²¹Miki ma ilomi patea sondo ŋana ŋgua rârâni wa vetâŋa rârâni wa. Ara ŋana miki ma kasana ŋgua ara tava vetâŋa ara kaika ndindi nâ, ²²aku kaŋgeŋge ŋana vetâŋa potomule rârâni kâ.

²³Maka kano pa Maro Kindeni, ina wisi-pisi warika, tu ma ilele miki ilomi kalomi ndo, ŋana miki ma kaveta vetâŋa ara nâ, ikura i ilo papa mine. Aku maka kano papa i tu ma ikatona karaemi wa koranami wa, ŋana miki ma kamo mbâra-mbâra nâ, nemi soki tonje tia, lâ zo ŋalae ŋinde Yesu Kirisi ma itaulo imâ kilo. ²⁴Maro Kindeni isarawami mungani lâ, aku i ma iveta vetâŋa ŋinde ipâŋga pami, ŋana tu i uru iveta ikura ne ŋgua pâŋa rârâni.

²⁵Nima-nambwe wukale, ara ŋana miki ma kalomi ŋgere ŋanama, aku kano pa Maro Kindeni tu ma isukama. ²⁶Aku ara ŋana miki taitu-taitu ma kapatâŋo mbaumi, ikura kinda kalo-tawana tamâta nenda mâsi mine. ²⁷Naŋa akai Maro ŋalae ndamwa ku aporo ŋgua mine pami: miki ma kapono ŋgua rârâni ikeno pepa ŋine tini pwataki panzi kalo-tawana tamâta rârâni siloŋo.

²⁸Nenda Maro ŋalae Yesu Kirisi ne wisi-wisi imâ pami.